

Inuussutissarsiornermut Aatsitassanullu Naalakkersuisoq Ove Karl Berthelsen

Innuttaasunik ataatsimiititsinermi tikilluaqqusilluni oqalugiaat

Ilisimatusarfik ulloq 27. august 2012

Asasakka innuttaasut.

Siullermik pingaarnertullu Isukasiani saviminissarsiorfissamut tunngatillugu innuttaasunik ataatsimiititsinerit katillugit sisamaasut siullersaannut ullumikkut tamaanga takkussimasusi tamassi qutsavigerusuppassi.

Kalaallit Nunaanni atugarissaarnerup qulakkeerneqarnissaanut tunngatillugu Kalaallit Nunaanni arlalitsigut unammilligassaqarpugut. Taamaattumik inuuniarnitsinni atugarissaarnerput attatiinnarsinnaassagutsigu, nutaanik isertitassaqaarnissamut periarfissanik nassaarniarnissarput pisariaqarpoq.

Aatsitassarsiornermi suliffissuaqarneq inuussutissarsiutitut siuariartorfiusutut, inuiaqatigiinni ineriartortitsinissamut periarfissaqarfiulertussatut nutaatut piukkunneqarpoq. Aatsitassarsiornermut suliassani inuiaqatigiinni iluanaarutissaqarfiusussat assigiinngisitaartorujussuupput, tassami tamanna ilaatigut nunap karsianut isertitaqartitsisussaavoq, suliffissaqartitsiviulertussaalluni,

ilinniartitaanermut iluaqusiisussaalluni aammalu suliffeqarfiutivut nutaanik periarfissaqartilertussaallugit.

Kisiannili ineriartortitsineq sunaluunniit ulluinnarni inuunitsinnut nunattalu siunissaanut pitsaasunik pitsaanngitsunillu sunniuteqartarpoq. Aatsitassarsiornermut suliassaqarfimmi ineriartortitsineq maani inuiaqatigiinnut maannakkut siunissamilu kinguaariinnut iluaqutaalissasoq Naalakkersuisut kissaatigisorujussuaat.

London Mining-ip Isukasiani saviminissarsiorfissaa, Kalaallit Nunaanni aatsitassarsiornermik suliassat annertunerusut arlallit pisussat siullersaasa ilaagaat.

Kalaallit Nunaanni aatsitassarsiorluni misissuinissamut soqutiginninnerup malunnaateqarluartumik annertusinera ukiuni kingulliunerusuni Kalaallit Nunaanni takuneqarpoq. Suliaqartut nunanit tamalaaneersut soorlu EU-mit, Kina-mit kingullertigullu Sydkorea-mit, tamarmik peqataarusullutik saqqummerput.

Kingullertigut Naalakkersuisut Siulittaasuata Kuupik Kleistip aamma Kommissionip, EU-p aamma Kalaallit Nunaata akornanni aatsitassanit pisuussutitut tunngatillugu suleqatigiinnissaq pillugu qanoq pilersarnermut nalunaarut atsioqatigiissutigaa.

Aatsitassarsiornermut suliassaqarfimmi ineriartortitsineri-
mut tunngatillugu Kalaallit Nunaanni ammasumik oqallinnissarput
pingaaruteqarpoq. Naalakkersuisut innuttaasunik
ataatsimiititsinerit ukua ingerlannerisigut, aatsitassarsiornermi
suliassat Isukasiani saviminissarsiorfissatut ittut
ineriartortinneqarnerannut atatillugu, kikkut tamarmik
pitsaanerumik peqataatinneqarnissaat aammalu

ammanerusumik ersarinnerusumillu ingerlatsinissaq pillugu kissaateqarneq naammassiniarusuppaat.

Innuttaasunik ataatsimiititsinerit taakkua aqqutigalugit arlaannaannulluunniit attuumassuteqanngitsumik ilisimasanik siammaanissap pitsaanerulersinnissaa aammalu ammasumik oqallinnerup siuarsarnissaa Naalakkersuisut kissaatigaat, taamaattumik ataatsimiinnerni aqutsisussamik qitiusumik allaffeqarfiup avataani tunuliaqutaqartumik Naalakkersuisut toqqaapput.

Innuttaasunik ataatsimiititsinerit London Mining-ip piaanissamut akuersissummik qinnuteqaataanut tunngatillugu tusarniaanerop ingerlaneranut ingerlasumut ilaatinneqassapput. Ataatsimiinnernit imaqarniliat Naalakkersuisunut tunniunneqassapput aammalu qinnuteqaatip Naalakkersuisunit suliarineqarnerani tusarniaanermut akissuteqaatitut ilaatinneqassallutik.

Taamaattumik inaarutaasumik suli suliaqartoqanngilaq, aammalu ilissi innuttaasut, minnerunngitsumillu sumiiffimmik atuisut, inaarutaasumik aalajangiinerup pinnginnerani isummassinnik misilittakkassinnillu immersueqataanissarsi pingaaruteqarpoq.

Erseqqissarusuppara suliassat taakkua avatangiisinut aamma inuiaqatigiinnut tunngatillugu naammattumik qulaajaavigineqarsimanissaat Naalakkersuisut annertuumik aallummassuk. Aamma taamaattumik innuttaasunik ataatsimiititsinerni pisussani qulequttat taakkua immikkut aallunneqartussaapput.

Ammasumik ersarissumillu oqallinnissaq aamma ilisimasanik
avitseqatigiinnissaq Naalakkersuisut kissaatigaat aammalu
neriuppugut pilersitsiviulluartumik peqataajumaartusi.

Qujanaq